

遵聞錄存是錄
東江始末存漢錄



Z121

1

13968 遵

G0451

聞

錄

梁
億
言

中
華
書
局

遵開錄

此據今獻彙言本
影印初編各叢書
僅有此本

遵聞錄

廣右梁億言

太祖親征陳友諒大戰于彭蠡湖與伯溫皆在

御舟以觀將卒搏戰伯溫忽躍起大呼

太祖亦驚起疑其作亂見伯溫雙手麾之連聲呼曰難星過可更舟

太祖如其言而更之坐未半餉舊舟已爲敵砲擊碎矣及後勝負未決伯溫密言于

太祖曰可移軍湖口期以金木相剋日決勝

太祖從之遂平陳氏

鞏昌侯郭子興從

太祖援南昌時癸卯秋七月也八月進駐鄱陽彭蠡湖水勢湍急友諒悉以舟連鎖爲陳旌旗樓櫓望之如山我軍舟小怯於迎攻

上親執旗四麾右師小却

上遂命斬隊長而下十餘人猶不能止時子興郭英侍側趨進曰彼舟如此大小不敵非人不用命也臣愚以爲非火攻不可

上驚顧英笑曰我得之矣即命開平王常遇春同子興等率諸將分調網船數百艘載芻蓄火以往別備走舸舟小來

往如飛趨泊其偽平章韓用珍舟下發火燃葛食頃風急
火猛烟焰漲天敵舟大不能動移悉爲燬燼燒燭死者不
可勝計諒敗走鞋山進退不能決復整兵來戰開平笑謂
子興曰前計良是舍此何爲哉復以火筏火舟連次以進
初風逆不可行少焉風順官軍鼓噪稱慶火勢大作敵州
敗走追奔數十里戰酣友諒勢迫啓蓬牕四顧親自督戰
子興望見訝其有異遽開弓射之箭貫其顙及睛而死餘
兵悉降時四方竊據僞號者雖多獨友諒兵力強大號稱
巨敵至是敗

上大喜曰郭子興一枝箭勝十萬師其功何可當也復顧謂

曰此賊亡天下不足定矣子興後屢立大功卒謚宣武追封陝國公

國初時御史皆築室以居之謂之御史廊每室有閣夜則御史宿於閣上有兩校尉宿於閣下以防之至凡出入起居必與之同每日以御史言動奏

聞以行誅賞

太祖開國之初用葉春王興宗直廳後有天下以其俱老成不貪除春爲儀鸞司副使陞福建布政使除興宗爲金華知縣李善長諫曰興宗由隸發身難以牧民

太祖曰興宗跟我數年勤而不貪又能處事雖儒吏不及於

牧民何有興宗到縣三年庶幹公勤得民之心秩滿陞南
昌通判調嵩州知州命院任亮集民爲軍興宗曰元末世
亂聚則爲軍散則爲民民皆爲軍稅糧何出奏乞止之
太祖從之陞懷慶知府朝京特正問養蠶種田官吏興宗亦
在數指揮毛驤奏王興宗亦當被問

太祖曰興宗公勤不貪不必問比還懷慶未久蘇州缺知府
太祖謂胡惟庸曰選一能人去未幾又曰蘇州知府曾有人
否惟庸曰未得其人

太祖曰我意懷慶知府王興宗可任惟庸曰臣思不到此
太祖曰行文書與王興宗就取便道速去到任三年盛有政

聲又陞爲河南布政赴京辭

太祖曰久不見面老矣我亦鬚白賜宴賞鈔撫而遣之旣抵任以事累事白病卒

太祖之定昇金陵蓋雖出自

聖意亦由馮國用與陶安之言也國用濠州定遠人歲甲午謁

太祖於妙山

太祖見而奇之曰爾被服若是其儒生耶問定天下計將安出國用對曰金陵龍蟠虎踞真帝王之都願先援金陵而定昇然後命將四征掃除群寇救生靈於水火勿貪子女

玉帛倡仁義以收人心天下不難定也

上大悅曰吾意正如是陶安太平當塗人乙未夏六月

太祖帥師渡江取太平路安與耆儒李習率父老出迎安見上狀貌謂習等曰龍姿鳳質非常人也我輩今有主矣

上召安與語善之因問吾欲取金陵何如安曰金陵古帝王之都龍蟠虎踞限以長江之險若取而有之據其形勢出以臨四方則何向不克其言亦合

上意國用後官至帳前總制親軍都指揮使事侍謀議安至翰林院學士嘉議大夫知制誥兼修國史二公蓋亦開國之功臣云

太平府不惹庵

太祖旣渡江嘗題詩於壁後庵僧洗之及有天下僧乃獻詩云

御筆題詩不敢留留時只恐鬼神愁曾將法水輕輕洗猶有餘光射斗牛

張士誠以厚幣招楊濂夫甚急濂夫勉行至姑蘇適元以龍衣御酒賜士誠濂夫因飲御酒遂作詩曰江南歲歲鋒烟起海上年年御酒來如此鋒烟如此酒老夫懷抱幾時開士誠聞之默然遂不強留其後濂夫歸於我

朝未幾而卒

國初時嘗欲征倭國彼遣使嗜哩嘛哈奉表乞降

上問倭國風俗如何嗜哩嘛哈以詩荅曰國比中原國人如
上古人衣冠唐制度禮樂漢君臣銀甕菊新酒金刀膾錦
鱗年年三二月桃李一般春

古岡黎先生名真號林坡

國初名儒也曾以非罪謫戍遼左同里馬某與焉既先生
蒙恩放回而馬獨不與其兄一日盛席以邀先生侑觴之
妓皆絕色也先生不往遺之以詩曰錦瑟銀箏白玉卮賞
音元自有鍾期可憐孤鴈長城外叫斷南雲總不知其兄
得詩爲之墮淚而罷宴

釋來復見心我

太祖聞其賢詔侍臣取其詩文而覽之特褒美勿置嘗承召賜食謝詩云淇園花發曉吹香手挽袈裟近

御末闕下彩雲移雉尾座中紅芾動龍光金盤蘇合來殊域玉盃醖醕出上方稠疊濫承天上賜華封三祝頌陶唐又嘗爲給事中海王時舉賦聽雨軒云掛冠盈得賦門居聽雨羅浮老故廬夜滴梧桐燈燼後曉鳴荷芰酒腥初打牕雨趁江濤急入座寒兼地籟虛曾憶候朝天上去五更泥滑出無驢又有送李宗遠歸廣東詩云三山水落鴈啼霜虎距關頭買去航明日相思望南斗江流不盡楚天

長又云太平身退更何憂歸老南山間故丘一色梅花三
萬樹夜和明月醉羅浮又云聞說商侯膽氣強校詩多在
白雲牕秋來椰子井如密寄我書緘五百雙又云鸚鵡杯
深泛紫霞風涼渾訝謫仙家錦袍留客催春燕開遍東園
萱蕊花其詩濃灑而演迤整暇而森嚴今有蒲庵集行于
世

羅復仁吉水人

國初時爲編修後乞休致

太祖賜以布衣而題其倨曰性雖麤率忠直可喜賜此布衣
放歸田里

今南京之紫金山

太祖陵寢在焉常有雲霧覆之或青或黃一日之間屢變其色昔漢高祖隱芒碭山其上常有五色雲吕后常求得之
蓋

帝王所在必有其異初無間於崩存也

花雲者懷遠人歲癸巳伏劒謁

太祖於臨濠命之宿衛常在左右丙申立行樞密院於太平以雲爲判庚子之夏僞漢陳友諒以舟師入圍太平城陷被執死之時妻郤氏生一子熾甫三歲郤氏以熾囑家人善撫養之投水而死侍兒孫氏遂收郤氏屍瘞之抱熾欲逃

他所爲僞漢軍虜之至九江軍中惡小兒啼孫氏恐兒被害以簪珥囑漁家嫗鞠之曰此兒良宜善視之是年冬至節僞漢敗孫脫身至漁家視兒在牕漁人出竊負以走宿陶穴中明日出江許僦舟以渡遇漢潰軍還爭舟梓孫氏及兒投之江方出沒波中有斷木自上流浮至附之入蘆渚中渚有蓮實孫氏取啗兒凡七日不死忽夜半聞人語聲呼之逢老父孫告之故與其偕行明年辛丑二月達上所

上聞雲兒即呼入見孫氏泣抱兒拜

上亦泣置兒於膝曰此花雲兒子將種也命賜老父衣忽不

見追之無所得愚謂江中無常流之木自古無冬實之蓮
渚中非人居之處孫氏與兒所附之木神木也所啗之蓮
神蓮也所遇之老父神人也蓋花雲爲國而死郗氏爲夫
而死是固天之所與而不忍使之無後者而孫受主母之
托流離困踣瀕九死以全其孤是亦天之所與而不忍死
之者也然則孫氏與煇之爲神物呵護而得以不殞其生
有由然哉

太祖征陳友諒王師至瀟湘賦詩云馬渡沙頭苜蓿香片雲
片雨渡瀟湘東風吹醒英雄夢不是咸陽是洛陽天葩露
藻豪宕英邁有如此